

Inatsisartut Suleriaasianni § 33 naapertorlugu aalajangiiffigisassatut siunnersuut una saqqummiupparput:

Brintiliornermut brintillu atorneqarnissaanut illoqarfinni imermit nukissiornermik pilersorneqartuni nukiup atorneqanngitsup atornissaanut Ilulissani misiliutaasumik suliniuteqarnissamut pilersaarummik Naalakkersuisut UPA 2018-imut saqqummiussinissamik peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortanit, Anders Olsenimit, Vivian Motzfeldtimit, Bendt B. Kristiansenimit, Debora Kleist-imit aamma Mala Høy Kúkomit).

Tunngavilersuut

Sanaartornermut ataatsimiititaliap paasisassarsiorluni suliaqarnermini paasisimavaa, illoqarfinni imermik nukissiornermit pilersorneqartuni innaallagialiap atorneqanngitsoortup brinti aqqutigalugu atornissaa periarfissaasoq.

Sanaartornermut ataatsimiititaliap isumaqarpoq, ukioq tamakkerlugu ukiulluunniit ilaani nukissiamik maanna sinneqartoortoqartartoq, taamaattumillu isumaqarluni brinti atorlugu nioqqutissiorneq suliniuteqarfigissallugu soqutiginaruusoq, taamaalilluni nukik pilersinneqartoq annaaneqassanngimmat. Brintiliornikkut nukiup atorneqanngitsoortup sinneruttup atorneratigut nukik toqqorneqarsinnaavoq assatorneqarsinnaallunilu, taamaalillunilu sumiiffinni allani nukimmik mingutsitsissutaanngitsumik pilersitsisoqarsinnaassalluni.

Ilulissani brintiliorfik sanaartorneqassaaq, taamaalillunilu brinti nioqqutissiarineqartoq assersuutigalugu Qeqertarsuarmi innaallagissamik nukissiornermut atugassatut assatorneqarsinnaassalluni (kiisalu kiassaateqarfinnit imeq kissartooq siaruaanneqaratarsinnaalluni).

Sanaartornermut ataatsimiititaliap qularutiginnigilaa, nukik mingutsitsissutaanngitsoq nukissiornermut sinneruttoortoq Kalaallit Nunaanni atorluarsinnaasariaqaripput. Illoqarfinni ataasiakkaani imermit nukissiorfeqanngitsuni immikkoortunut akissaajaatit

annikillisinneqarnissaannut iluaqutissiisoqassappat, taava tamanna avatangiisinut aamma iluaqutisseeqataassaaq.

Sanaartornermut ataatsimiititaliaq isumaqarpoq, misiliutaasumik suliniummut aningaasalersuineq pilersitsiffiusumi Nukissiorfiit immikkoortumut akissaajaataanut ilaatinneqartariaqanngitsaq, kisiannili suliniut nuna tamaat eqqarsaatigalugu – tassa Nunatta Aningaasivianit – aningaasalersorneqartariaqartoq, kiisalu tamatumunnga aningaasat pisariaqartut aningaasaliissutaasariaqartut.

Sanaartornermut ataatsimiititaliaq paasisassarsiorluni suliaqarnermini paasitinneqarsimavoq, namminersorlutik tunisisartut naleqquttut peqatigalugit aningaasalersueriaaseq BOT-finansiering (Build, Operate, Transfer / Sanaartorneq, Suliaqarnej, Tunniussineq) atorlugu misiliutaasumik suliniummut aningaasalersuisoqaratarsinnaasoq

Sanaartornermut ataatsimiititaliap Naalakkersuisut kaammattorpai, suliniummut aningaasalersuinissat pillugit pilersaarummik saqqummiussinnginnermi aningaasalersueriaatsinut periarfissat assigiinngitsut sukumiisumik misissussagaat.

Pisortanut allaffissornikkut aningaasatigullu sunniutissai:

Suliat ingerlannissaanut Nukissiorfiit sulisunik sulisitaqassasut naatsorsuutigisariaqarpoq. Tamatumani sulisut atorneqartut Nukissiorfiit nammineerlutik nassaarisinnaasariaqarpai, imaluunniit naalakkersuisoqarfimmit suliaqartuusumit atugassiissutinit nassaarineqarsinnaasariaqartut. Taamatut misissuinerup nalinga sulisup akiup affaanik sulisinneqarnissaanik taamaallaat naleqassasoq naatsorsuutigisariaqarpoq, naatsorsuutigineqarportaarlu suliat allat ilanngullugit aamma suleqatigiinnikkut ingerlanneqarsinnaanissaa.

Brintip atorneqarneratigut nukissiornitsinni ikummatissap uumassusilinnit pisup 10-20 %-ia pisariaarutissaaq, tamannalu nukimmik mingutsitsissutaanngitsumik aamma kinguneqassaaq, kisiannili aamma uuliamik avataanit ataavartumik eqqussuineq annikillissaaq. Tamanna niuernitsinni nuna tamakkerlugu oqimaaqatigiissitsinitsinnut aamma ajunngitsumik sunniuteqassasoq naatsorsuutigineqarpoq.

Namminersorlutik suliaqartunut allaffissornikkut aningaasatigullu sunniutissai:

Nukiup mingutsitsissutaanginnerusup atulenera ingammik sanaartornerup nalaani namminersorlutik inuussutissarsiortut suliassaqarnerulerannik kinguneqarnissaa naatsorsuutigineqarpoq. Allaffissornikkut aningaasatigullu annertunerusumik kinguneqassasoq naatsorsuutigineqanngilaq.

Innutaasunut allaffissornikkut aningaasatigullu sunniutissai:

Suliffissanik amerlanerusunik killimmik pilersitsisoqarnissaa aamma nuna tamakkerlugu aningaasaqarnerup pitsanngoriaateqarnissaa naatsorsuutigineqarpoq.